

## Pwuhken ESRA

### *Oaralap en Pwuhk wet*

*Pwuhken Esra*, iei usepen *Kronikel kan*, me koasoia duwen sapahldohn ekei mehn Suhs me kalipiliplahng Papilon, oh duwen ar onehda sapahl arail mour oh kaudok nan Serusalem. Koasoiepen mwekid pwukat eri ahpw kasalehda nan irair siluh me pahn wadawad pah nin duwe met: 1) duwen keieun pwihn en mehn Suhs me kalipilipalahr ar pwurodohsang Papilonia sang ni koasoandi en Sairus, nanmwarki lapalap en Persia. 2) duwen arail kauwada sapahl Tehnpas Sarawio oh isimwasehla, oh duwen ar pwurehng wia kaudokohng Koht nan Serusalem. 3) duwen pil ehu pwihnen mehn Suhs me pwurodohng Serusalem mwurin sounpar kei pahn kaweidpen Esra, ohl koahiek ni Kosonned en Koht, me wiahda koasoandi ehu pwe mehn Suhs akan en mweisang ar pwoud lihen liki kan pwe tiahk sarawien Israel kan en silasildi mwahu.

Audepe ni Oaralap

Keieun sapahldo sang ar kalipilipala 1.1—2.70

Tehnpas Sarawio onohnda sapahl oh isimwasala 3.1—6.22

Esra iang me kalipilipala teikan pwurodo 7.1—10.44

*Nanwarki Sairus ketin Koasoanehdi mehn Suhs akan en Pwuralahng Uhdakarail*

<sup>1</sup> Nin tepin sounpar en mwehin Nanmwarki Lapalapa<sup>a</sup> Sairus, mehn Persia, KAUN-O ketin kamwakid kupwur en

---

<sup>a</sup> 1:1: NANMWARKI LAPALAP: Sairus, nanmwarkien Persia kalowehdi oh kousoanla nan kahnimw Papilon pahr 539 mwohn Kraish oh e tapihada kakaun nin duwen nanmwarki lapalap en wehin Papilonia.

nanmwarkio pwe en padokada oh ntingihedi kosonned ehu oh lohkiseli ni pokon sansal wasa koaros nan sapwellime wehi. Met wiawiher pwe mahsen en KAUN-O rehn soukohp Seremaia en pweida.

<sup>2</sup> “Iet audepen kosonned en Sairus, nanmwarki lapalap en Persia, KAUN-O, Koht en Nanleng, ketikihong ie manaman pohn wehi koaros en sampah, oh pil pwukoapen kauwada ehu tehnpese nan kahnimw Serusalem, nan wehin Suda. <sup>3</sup> Eri, Koht en ketiket rehmwail rehn sapwellime aramas akan koaros. Kumwail patohdahla Serusalem nan wehin Suda oh onehda sapahl Tehnpas en KAUN-O, Koht en Israel, Koht me kumwail kin wauneki oh kaudokiong nan Serusalem. <sup>4</sup> Ma mehmen sang rehn sapwellimen Koht aramas akan wasaht uhdahn pahn anahne sawas pwe en kak iang pwuralahng Serusalem, eri, mehn mpe kan en patohwanohng soangen sawas wet. Re en sewesehki silper oh kohl, kepwe oh mahn akan, pil soangen dipwisou kan me e kak meirongkihla nan Tehnpas en Koht nan Serusalem.”

<sup>5</sup> Eri, kaunen peneinei kan en kadaudok en Suda oh Pensamin, samworo kan oh mehn Lipai kan, pil iangahki irail koaros me KAUN-O ketin kamwakidada kapehdirail kan, re ahpw onopada pwe re en iang patohdalahng onehda sapahl Tehnpas Sarawien KAUN-O nan Serusalem. <sup>6</sup> Mehn mparail koaros ahpw iang sewesehkin irail soahng tohto, duwehte dahl, silper, kohl, kepwe, mahn, oh soangen dipwisou pweilaud teikan, oh mehn wia ar meirong nan Tehnpas Sarawio.

<sup>7</sup> Nanmwarki Sairus pil ketikihong irail dahl ako oh kep ko me Nanmwarki Nepukadnesar ketikihsang Serusalem oh kapwatahkihda Tehnpas en sapwellime

koht akan. <sup>8</sup> Nanmwarki Sairus ahpw ketikihong Midredad, sounkanekid dipwisou kesempwal en wehio. Midredad eri wadekedi oh uhd patohwanohng Sespasar, kepinahn Suda, dipwisou pwukat. <sup>9-10</sup> Eri, iet uwen tohtohn dipwisou ko:

dahl laud kohl, mehn meirong me	30
dahl laud silper, mehn meirong me	1,000
soangen dahl laud teikan me	29
dahl tikitik kohl me	30
dahl tikitik silper me	410
soangen dahl laud teikan me	1,000

<sup>11</sup> “Eri, koaruhsie patpene me 5,400 dahl kohl oh silper oh soangen dahl teikan me Sespasar patohwanda ni eh mweselsang Papilon kolahng Serusalem iangahki mehn Suhs teiko.

## 2

### *Mwaren Irail Me Sapahldohsang arail Kalipilipala (Nehmaia 7.4-73)*

<sup>1</sup> Me tohto rehn me kalipilipala ko mweselsang Papilon oh pwuralahng Serusalem oh Suda, emenemen pwuralahng nan uhdake. Arail peneinei kan wie kokousoanki arail kalipilipala nan Papilon sang ni ahnsou me Nanmwarki Nepukadnesar ketin salihiraildi oh ketikilahng irail wasao. <sup>2</sup> Arail kaun ako iei Serupapel, Sesua, Nehmaia, Seraia, Relaia, Mordekai, Pilsan, Mispar, Pikpai, Rehum, oh Paana.

Iet mwaren peneinei kan en Israel, iangahki uwen tohtohn irail kan sang ni ehuehu peneinei me sapahldohsang arail kalipilipala:

<sup>3-20</sup> Paros-2,172

Sepataia-372

Ara-775

Pahda Mohap (kadaudok en Sesua oh Sohap)-2812

Elam-1254

Sattu-945

Sakkai-760

Pani-642

Pepai-623

Askad-1222

Adonikam-666

Pikpai-2056

Adin-454

Ater (me pil mwarenki Esekaia)-98

Pesai-323

Sora-112

Asum-223

Kippar-95

<sup>21-35</sup> Aramas akan me ar pahpa kahlap ako kin kousoan  
nan kahnimw pwukat pil pwurodo:

Pedleem-123

Netopa-56

Anadod-128

Asmaped-42

Kiriad Searim, Kepihra, oh Peerod-743

Rama oh Kepas-621

Mikmas-122

Pedel oh Ai-223

Nepo-52

Makpis-156

Elam teio-1254

Arim-320

Lod, Adid, oh Ono-725

Seriko-354

Sena-3630

36-39 Iet mwaren peneineien samworo kan me sapahldohsang arail kalipilipala:

Sedaia (kadaudok en Sesua)-973  
 Immer-1052  
 Pasuhr-1247  
 Arim-1017

40-42 Peneineien mehn Lipai kan me sapahldohsang arail kalipilipala:

Sesua oh Kadmiel (kadaudok kan en Odapaia)- 74  
 Sounkoul kan en Tehnpas Sarawio (kadaudok kan en  
 Asap)- 128  
 Sounsilasil kan en Tehnpas Sarawio (kadaudok kan en  
 Sallun, Ater, Dalmon, Akkup, Adida, oh Sopai)- 139

43-54 Peneineien tohndoadoahk kan en Tehnpas Sarawio me sapahldohsang arail kalipilipala:

Siha, Asupa, Tappaod,  
 Keros, Siaha, Padon,  
 Lepana, Akapa, Akkup,  
 Akap, Samlai, Ahnan,  
 Kiddel, Kahar, Reaia,  
 Resin, Nekoda, Kassam,  
 Ussa, Pasea, Pesai,  
 Asna, Meunim, Nepisim,  
 Pakpuk, Akupa, Aruhr,  
 Paslud, Mehida, Asra,  
 Parkos, Sisera, Tema,  
 Nesaia, oh Adipa

55-57 Peneineien sapwellimen Solomon sounpapah kan me sapahldohsang arail kalipilipala:

Sotai, Assopered, Peruda,  
Saala, Darkon, Kiddel  
Sepataia, Attil, Pokedred Assepaim, oh Ami

<sup>58</sup> Uwen tohtohn kadaudok kan en tohndoadoahk en nan Tehnpas Sarawio oh sapwellimen Solomon sounpapah kan me sapahldohsang arail kalipilipala me 392.

<sup>59-60</sup> Aramas 652 me towehda peneineien Delaia, Dopaia, oh Nekoda me sapahldohsang kisin kahnimw kan en Tel Mela, Tel Arsa, Kerup, Addan, oh Immer; ahpw re sohte kak kadehdehda ma irail iei kadaudok en Israel.

<sup>61-62</sup> Peneineien samworo pwukat sohte diarada pwuhk eh u me kak kadehdehda wasa re kodoudousang ie: Apaia, Akkos, oh Parsilai. (Ohl me tepin kadaudok en samworo me adaneki Parsilai pwoudikihda lih emen sang nan peneineien Parsilai mehn Kilead oh uhd adanekihla eden en eh pwoudo eh pahpa.) Pwehki eh sohte sansal ihs me arail pahpa kahlap, kahrehda re sohte kak iang wiahla samworo. <sup>63</sup> Kepinahn mehn Suhs padahkihong irail me re sohte kak iang kepin konotki me kin meirong ong Koht lao e pahn mie samworo men me pahn kak doadoahngki Urim oh Dummim.

<sup>64-67</sup> Uwen tohtohn me kalipilipala me sapahldo-42,360  
Neirail sounpahpa ohl oh lih akan- 7,337  
Sounkoul ohl oh lih akan- 200  
Oahs-736  
Kou en doadoahk- 245  
Kamel- 435  
Ahs- 6,720

<sup>68</sup> Ni ahnsou me aramas kalipilipala ko lellahng ni Tehnpas en KAUN-O nan Serusalem, ekei kaunen peneinei ko ahpw patohwanda arail meirong sang ni nsenarail pwehn sewese kauwada sapahl Tehnpas Sarawio wasa me e kin

mieo. <sup>69</sup> Re patohwanda uwen me re kak ong ni doadoahk wet, oh uwen kohl me re patohwanpene mihmi ni paun 1,030, silper paun 5,740, oh likoun samworo 100.

<sup>70</sup> Samworo kan, mehn Lipai kan, oh ekei aramas ako ahpw soandiong nan de limwahn Serusalem; sounkoul ko, sounsilasil en Tehnpas Sarawio, oh tohndoadoahk en Tehnpas Sarawio soandiong nan kisin kahnimw keren kan; oh luhwen mehn Israel ko soandiong nan kisin kahnimw kan wasa me arail pahpa kahlap ako kin kousoan ie mahs.

### 3

#### *Kaudok Pwurehng Tepida*

<sup>1</sup> Eri, mwurin sounpwong isuh, mehn Israel ko soandiong nan arail kahnimw oh wasa kan. Irail koaros eri pokonpene nan Serusalem. <sup>2</sup> Sesua, nein Sehosadak, oh ienge samworo ko, oh Serupapel, nein Sealtiel, iangahki eh peneinei kan, re ahpw onehda sapahl pei sarawien Koht en Israel, pwe re en kak wia powe ar meirong isihs, duwen me ntingdier nan Kosonned en Moses, ladun Koht. <sup>3</sup> Mehndahte aramas kalipilipala ko ar masak aramas akan me kin koukousoan nan sahpwo, a re pil kauwadahte pei sarawio wasahte me e uhda ie mahso. Eri, re ahpw tapihada wia ar meirong isihs powe, nimenseng oh nin soutik. <sup>4</sup> Irail eri wia Sarawien Impwal, nin duwen me koasoandier, oh ehuehu rahn re kin wia ar meirong me koasoandiong ni rahno. <sup>5</sup> Re pil kapatahiong meirong isihs unsek ko me kin wiawi rahn koaros oh me kin wiawi ni ahnsoun Sarawien Maram Pwul, oh ni arail pokon teikan koaros en kaudokiong KAUN-O, iangahki meirong koaros me kin wiawihong KAUN-O sang ni pein nsenen

---

2:70: 1 Kron. 9.2; Neh 11.3.

3:2: Eks. 27.1.

3:3: Nempe 28.1-8.

3:4: Nempe 29.12-38.

emenemen. <sup>6</sup> Mehndahte aramas akan ar saikinte tapihada onohnsapahl en Tehnpas Sarawio, ahpw re tapihada wia meirong isihs ong KAUN-O sang ni rahn keieu nan keisuhwen sounpwong.

*OnohnSapahl en Tehnpas Sarawio Tepida*

<sup>7</sup> Aramas akan ahpw kihda mwohni mehn pwain tohndoadoahk en wia takai oh sounkou ihmw kan. Re pil kihda kisin tungoal, iangahki pihl, oh pil lehn olip, mehn pekederlahng kahnimw Dair oh Saidon, mehn kawiliali tuhke sidar sang Lapanon oh idandohng Sopa. Eri, mewukat koaros wiawihier sang ni mweimweien Nanmwarki Lapalap Sairus, mehn Persia. <sup>C</sup>

<sup>8</sup> Eri, ni keriaun sounpwong en pahr mwurin ar sapahldohng wasa kis limwahn Tehnpas Sarawio nan Serusalem,<sup>d</sup> re ahpw tapihada doadoahk. Eri, Serupapel, Sesua, oh iangara mehn Suhs koaros, samworo oh mehn Lipai kan, iangahki aramas koaros me sapahldohng Serusalem sang nan ar kalipilipala, re wiahkinteiou tapihada doadoahk. Mehn Lipai koaros me mahkier sounpar 20 kohda me ale pwukoahn apwahpwalih doadoahk en onohnsapahl en Tehnpas Sarawio. <sup>9</sup> Eri, Sesua, mehn Lipai men, oh nah kan—peneineien Odapaia—re pwungkipene re en kin apwahpwalih oh kaunda kaudok kan en nan Tehnpas Sarawio. (Mehn Lipai sang nan peneineien Enadad pil iang seweseirail.)

<sup>10</sup> Ni ahnsou me ohl ako tapihada koasoanehdi poahsoan en Tehnpas Sarawio. Samworo kan ahpw mi nan ar likou reirei oh mi nan dewerail oh kolokol neirail sowi kan.

---

3:5: NEMPE 28.11–29.39. <sup>C</sup> 3:7: MEHN PERSIA: Sairus wia nanmwarki lapalap en Persia sang pahr 539 lel pahr 530 mwohn Krais. <sup>d</sup> 3:8: SAPAHLDOHNG...NAN SERUSALEM: Me kalipilipala ko sapahldohngehr Serusalem ni pahr 538 mwohn Krais.



Eri, mehn Lipai kan sang peneineien Asap, re pil iang mi wasao, re wa neirail keseng simpal kan. Re ahpw kin kapikapinga KAUN-O nin duwen me Nanmwarki Depit koasoanedier. <sup>11</sup> Re ahpw koulkihong KAUN-O koulén kaping wet:

“KAUN-O me kupwurkalahngan, oh sapwellime limpoak ong Israel me poatopoaat.”

Aramas koaros ahpw kin weriwer uwen ar kak, kapikapinga KAUN-O, pwehki poahsoan en Tehnpas Sarawio eh koasoansoandier. <sup>12</sup> Me tohto rehn samworo mah ko, rehn mehn Lipai ko oh rehn kaunen peneinei ko me kilangehr Tehnpas Sarawien mahso. Eri, ni ar kilikilang duwen poahsoan en Tehnpas wet eh wie koasoakoasoansoan, re ahpw sengiseng. A meteikan me iang mi wasao, re ngisingiski ar peren. <sup>13</sup> Eri, sohte me kak kilelehdi ngilen me pereperen ko sang ngilen me wie sengiseng ko, pwe ngilarail ko inenen laud mehleh oh kin kadirehla wasao lelohng wasa doh kan.

## 4

### *Uhpenehn Kokouda Sapahl en Tehnpas Sarawio*

<sup>1</sup> Imwintihti kan en mehn Suda oh Pensamin ahpw ron-gada me irail ko me sapahldohsangehr ar kalipilipala pwurehng kokou Tehnpas en KAUN-O, Koht en Israel.

<sup>2</sup> Irail eri kohla tuhwong Serupapel oh kaunen peneinei kan oh patohwan, “Kumwail mweidohng kiht se en iang kauwada Tehnpas Sarawio. Se kin kaudokiong Kohtothe me kumwail kin kaudokiong, oh se kin wiewia meirong kan ong ih sangete ni ahnsou me Esaradon, nanmwarki

---

3:10: 1 Kron. 25.1.    3:11: 1 Kron. 16.34; 2 Kron. 5.13; 7.3; Mel. 100.5; 106.1; 107.1; 118.1; 136.1; Ser. 33.11.    3:12: Dop. 14.5.

lapalap en Asiria, ketin kadarkitodohng wasaht pwe se en kousoan ie.”

<sup>3</sup> Serupapel, Sesua, oh kaunen peneinei ko ahpw mah-sanihong irail, “Se sohte anahne amwail sawas ong ni kokoupen tehnpesen KAUN-O, at Koht. Pein kiht pahn kauwada, nin duwen me Sairus, Nanmwarki Lapalap en Persia ketin koasoanediong kiht.”

<sup>4</sup> Aramas ako me koukousoan nan sahpwo eri song re en kamasak oh katikitikihala nan kapehd en mehn Suhs ko pwe re en dehr wia doadoahko. <sup>5</sup> Re pil pwain ni rir lapalap akan en koperment en Persia pwe re en uhwong arail doadoahko. Re wiewia met erein mwehin Nanmwarki Lapalap Sairus oh lellahng nan mwehin Nanmwarki Lapalap Darius.<sup>e</sup>

### *Uhpenehn Kokouda Sapahl en Serusalem*

<sup>6</sup> Ni tepin mwehin Nanmwarki Lapalap Serksihs, imwintihti en aramas ako me koukousoan nan Suda oh Serusalem ahpw wiahda kisinlikou en uhwong irail.

<sup>7</sup> Pil ni mwehin Ardaserksihs, nanmwarki lapalap en Persia, Pislam, Midredad, Tapeel, oh iangarail ko wiahda ehu kisinlikou ong nanmwarki lapalapo. Kisinlikowo ntingda ni mahsen en Aramaik <sup>f</sup> oh kawehwehpe ahpw pahn wiawi ni ahnsou me kisinlikowo pahn wadawad.

<sup>8</sup> Rehum, kepinao, oh Simsai, sounnting en sahpwo, pil ntingihada kisinlikou kiset ong Nanmwarki Lapalap Ardaserksihs duwen Serusalem:

---

4:2: 2 Nan. 17.24-41. <sup>e</sup> 4:5: NANMWARKI LAPALAP DARIUS: Koasoiepen mwekid wet peusla ni ire tikitik 24. Sang ni ire tikitik 6-23 wia ehu koasoi me pweidahr kerenieng pahr 100 mwuri. 4:6: Est. 1.1. <sup>f</sup> 4:7: ARAMAİK: Sang ni ire laud 4.8 lel 6.16; pwuhk wet sohte ntingdi ni mahsen en Ipru, ahpw ni mahsen en Aramaik, me iei mahsen me lapalap akan kin doadoahngki nan wehin Persia.

<sup>9</sup> “Sang rehn kepina Rehum, Simsai, sounnting en sahp-wet, iangarail kan, sounkopwung kan, oh sang lapalap teikan koaros, me wia ohl pwilidak en Erek, Papiion, oh Susa nan wehin Elam, <sup>10</sup> iangahki aramas teikan me kemwekidsang arail wasa kan sang ni manamanlap en Asurpanipal oh kousoanla nan kahnimw en Sameria oh wasa teikan en Pwallap en Palikapi-en-Iupreitis.”g

<sup>11</sup> Iet audepen kisinlikowo:

“Ong Nanmwarki Lapalap Ardaserksihs, sang sapwellime ladu kan, ohl akan en Palikapi-en-Iupreitis.

<sup>12</sup> “Se men Wasa Lapalap en mwahngih duwen mehn Suhs kan me patohdohr wasaht sang nan limomwi teikan patohwan kousoanlahr nan Serusalem oh kokou sapahliah kahnimw suwed oh kahngohdio. Re tapihadahr kokou sapahl kehl kan oh e kereniengehr nekila. <sup>13</sup> Maing, Wasa Lapalap, ma kahnimw wet pahn onohnda sapahl oh kehl kan wiawihda, aramas ako sohla pahn pwain daksis, oh sapwellimomwi wasahn nahk mwohni pahn tikitikla. <sup>14</sup> Eri, pwehki at patopato pahn inoun papah Wasa Lapalap, se sohte men patohwan kilang soahng wet eh pahn pweida, kahrehda se peki <sup>15</sup> komwi en koasoanehdi ehu roporop en wiawi nan pwuken poadopoad me omwi pahpa kahlap ako nekidalahr. Ma komwi pahn wia met, komwi pahn diarada me kahnimw wet kin kahngohdi ahnsou koaros oh sang kawa kohdo e kin kahrehiong kahpwal ong nanmwarki kan oh kaun akan en sahpw teikan. Apwal aramas en kaunda tohn wasao. Ihme kahrehda kahnimwo mwomwla. <sup>16</sup> Eri, se wehwehki me ma kahnimw wet pahn kokouda sapahl oh kehl kan wiawihda, Wasa

---

g 4:10: PWallap en Palikapi-en-Iupreitis: Met iei pwallap en wehin Persia. Wehin Suda wia kisehn pwallap wet me mi palikapien Pillap Iupreitis.

Lapalap pahn sohla kak ketin kolokol manaman ong Palikapi-en-Iupreitis.”

<sup>17</sup> Nanmwarki Lapalapo eri kadarala pasapeng wet:

“Ei rahnmwahu ong Kepina Rehum, Simsai, sounting en sahpwo, oh iangarail kan me kin koukousouan nan Sameria oh wasa teikan en Palikapi-en-Iupreitis.

<sup>18</sup> “Kisinlikou me kumwail kadarodo kawehwehdier oh wadawadohng ie. <sup>19</sup> I wiadahr ehu koasoandien roporop en wiawi, oh mehlele e dierekdahr me sang kawao kohdo Serusalem moromorada oh uhwong koasoandien nanmwarki oh me diren kahngohdi oh sounwie moromor. <sup>20</sup> Nanmwarki kehlaile kan kaundahr wasao oh kakaun sahpw koaros en Palikapi-en-Iupreitis, rikirikpene daksis oh mwohni en koperment. <sup>21</sup> Ihme kahrehda kumwail pahn wiahda koasoandi kei me ohl akan en tokedihsang arail onesapahl kahnimwo lao I pahn kihda ehu koasoandi mwurin met. <sup>22</sup> Kumwail wia met ni ahsou mwadang, pwe ehu soangen mwekid de pil wiawi oh kauwehla ei koasoandi.”

<sup>23</sup> Ni ahsowohte me kisinlikou kiset sang Nanmwarki Lapalap Ardaserksihs wadawadohng Rehum, Simsai, oh iangara kan, re ahpw mwadangalahng Serusalem oh iding mehn Suhs kan en tokedihsang arail onesapahliah kahnimwo.

### *Doadoahk en Tehnpaso Pwurehng Tepida*

<sup>24</sup> Kokoupen Tehnpas Sarawio katoktokdi oh wiewiaier soahngo lao lel ni keriaun sounpar en mwehin Darius,<sup>h</sup>

---

<sup>h</sup> 4:24: DARIUS: Iei Darius Keieu me ketin wia nanmwarki lapalap en Persia sang pahr 522 lel 486 mwohn Kraiss. 4:24: Ak. 1.1; Sek. 1.1.

## 5

<sup>1</sup> Ni ahnsowo soukohp riemen, Akkai oh Sekaraia nein Iddo, tapihada kokohp ni mwaren Koht en Israel ong mehn Suhs me kin koukousoan nan Suda oh Serusalem.

<sup>2</sup> Ni ahnsou me Serupapel nein Sealtiel oh Sesua nein Sehosadak rongada ara kokohpo, re ahpw tapihada one-sapahl Tehnpas Sarawio nan Serusalem, oh soukohp riemeno sewesei irail.

<sup>3</sup> Ni ahnsowohte Tattenai, kepinahn Palikapi-en-Iupreitis, Sedar Posenai, oh iangara me lapalap akan ahpw patohlahng Serusalem oh iding irail patohwan, “Ihs me kihong kumwail mweimwei en kauwada Tehnpas wet oh kihong dipwisou?” <sup>4</sup> Re pil kalelapak mwaren ohl koaros me iang sewesewese kokoupen Tehnpas Sarawio. <sup>5</sup> Ahpw Koht ketin sinsile kaunen mehn Suhs kan, ihme lapalap akan en Persia wie lamalamki me re sohte pahn wia mehkot lao re kak ntinglahng Nanmwarki Lapalap Darius oh ale sapwellime pasapeng. <sup>6</sup> Eri, iet audepen kisinlikou me re kadalalahng nanmwarki lapalapo:

<sup>7</sup> “Ong Nanmwarki Lapalap Darius, komwi en ketin kakaun ni popohl.

<sup>8</sup> “Wasa Lapalap en ketin mwahngih me se patohlahngehr Suda oh diarada me Tehnpas en Koht lapalahpieo pwurehngehr onohnsapahl oh lapalahn koasoakoasoak en takai oh lohlo kan kodahngehr ni dihdo. Doadoahko wiawidahr ni keneinei oh wenwenla mwowe.

<sup>9</sup> “Kiht eri kalelapak rehn kaunen aramas ako re en patohwanohng kiht ihs me patowanohng irail mweimwei en onehda sapahl Tehnpas Sarawio oh patohwanohng dipwisawi. <sup>10</sup> Se pil kalelapak mwararail kan pwe se en kak padahkihong komwi ihsnge me kaunen doadoahk wet.

- <sup>11</sup> “A re sapeng, patohwan, ‘Kiht sapwellimen Koht en nanleng oh sampah ladu, oh se onohnesapahl Tehnpas Sarawio me nanmwarkien Israel manaman emen ketin kauwadahr oh ketikihongehr dipwisawi sounpar ekei samwalahr. <sup>12</sup> Ahpw pwehki at pahpa kahlap ako ar kahngiangihadahr Koht en nanleng, e ketin mweidohng Nepukadnesar, nanmwarkien Papilonia en kaloweiraildi, ni mwehin mehn Kaldea. Tehnpas Sarawio ohla, oh aramas ako kalipilipala nan Papilonia. <sup>13</sup> Eri, ni tepin sounpar en mwehin Nanmwarki Sairus, me wia nanmwarki lapalap en Papilonia, Sairus ketin wiahda kosonned ehu me Tehnpas Sarawio en onohnda sapahl. <sup>14</sup> E ketin kapwurehdo kohl oh silper en nan Tehnpas Sarawio me Nepukadnesar ketikihongehr nan Tehnpas Sarawio nan Serusalem oh ketikihdong nan tehnpeseo nan Pabilon. Nanmwarki Lapalap Sairus ketikihong dipwisou pwukat rehn ohl emen me mwarenki Sespasar, me e ketin pilada en wia kepinahn Suda. <sup>15</sup> Nanmwarki lapalapo mahsanihong en kapwurelahng dipwisou ko nan Tehnpas Sarawio nan Serusalem, oh onehda sapahl Tehnpaso wasa me e uhdahn mie mahs. <sup>16</sup> Sespasar eri patohdo oh patohwandahng poahsoane; doadoahko eri tepida sang ni ahnsowo lel met, ahpw e saikinte nekila.’
- <sup>17</sup> “Eri, ma Wasa Lapalap pahn kupwurkalahngan oh wia ehu roporop ong pwuken nanmwarki kan nan Pabilon, pwehn rapahki ma mehlel de soh Nanmwarki Lapalap Sairus ketin wiahda koasoandien onohnsapahl ong Tehnpas Sarawio nan Serusalem, oh komwi kehsehkin kiht dah kupwuromwi ong irair wet.”

## 6

*Sapwellimen Nanmwarki Lapalap Sairus Kosonned Pwurehng Dierekda*

<sup>1</sup> Eri, Nanmwarki Lapalap Darius ahpw ketin koasoanehdi pwe roporop ehu en wiawi nan Papilon wasa kan me sapwellimen nanmwarki lapalap kosonned de koasoandi kan kin nekinekla ie. <sup>2</sup> Ahpw nan kahnimw Ekpadana nan wehin Media re diarada doaropwe ehu me audaudkidahr irair pwukat:

<sup>3</sup> “Ni keieun sounpar en sapwellime wehi, Nanmwarki Lapalap Sairus ketikihda kosonned ehu me Tehnpas Sarawio nan Serusalem en onohnda sapahl pwe en wiahla wasa me meirong kan en kin wiawi ie oh isihsla ie. Tehnpaso pahn ilehki piht 90 oh tehlapki piht 90. <sup>4</sup> Dihdo pahn wiawihki irekdahn takai siluh me irairki dinapw. Pweipwei koaros pahn kin kohsang ni sapwellimen nanmwarki wasahn nekidala mwohni. <sup>5</sup> Pil ehu, dahl kohl oh silper ko me Nanmwarki Nepukadnesar ketikihsang nan Tehnpas Sarawio nan Serusalem ketikilahng Papilon, re uhdahn pahn kapwurupwurdohng nan dewerail nan Tehnpas Sarawien Serusalem.”

*Nanmwarki Lapalap Darius Koasoanehdi Doadoahko en Pepeuslahte*

<sup>6</sup> Nanmwarki Lapalap Darius eri ketin kadarala pasapeng wet:

“Ong Tattenai, kepinahn Palikapi-en-Iupreitis, ong Sedar Posenai, oh ong iengara lapalap koaros en Palikapi-en-Iupreitis.

“Kumwail piseksang Tehnpas Sarawio, <sup>7</sup> oh dehr kedirapwa eh wiewiawi. Kumwail mweidohng kepinahn Suda oh kaunen mehn Suhs akan pwe re en onehda sapahl Tehnpas Sarawien Koht wasaohte me e

uhda ie mahso. <sup>8</sup> I koasoanediong kumwail en sewe-seirail kauwada. Eri, tohndoadoahk kan en kin ale pweipwei mwiadang sang ni sapwellimen nanmwarki mwohni me kin rikirikda sang ni daksis kan en Palikapi-en-lupreitis, pwe arail doadoahk en pepeuslahte. <sup>9</sup> Kumwail pahn kin kihong samworo kan en Serusalem rahn koaros, sohte kasapwungehla, mehkoaros me re pahn kin ndaiong kumwail re kin anahne: duwehte kouwol pwul, sihpw de sihmpwul, mehn wia ar meirong isih sang ong Koht en Nanleng, de wihd, soahl, wain, de lehn olup. <sup>10</sup> Eri, met pahn kin wiawi pwe re en kak wia meirong me pahn kin kaparanda kupwur en Koht en Nanleng, oh pwe re en kapakapkin ie oh nei seri kan. <sup>11</sup> I pil koasoanehdi pwe ma mehmen sohte pahn peikiong kosonned wet, apwoat reullap en imwe en kohdihsang oh perperda keng, pwe en kak doakoa paliwere pwar. Oh pil imwe en kerengkidi wiahla koasoakoasoak en kihd ehu. <sup>12</sup> Eri, I peki pwe Koht, me ketin pilada Serusalem pwe en wiahla wasahn kaudok ong ih, en ketin kamwomwala nanmwarki men de wehi ehu sohte lipilipil me pahn uhwong kosonned oh song en kauwehla Tehnpas Sarawio. Ngehi, Darius, me padokadahr kosonned wet. Eri, koaruhsie en kapwaiada ineng en kosonned wet unsek.”

### *Isimwas en Tehnpas Sarawio*

<sup>13</sup> Eri, Kepina Tattenai, Sedar Posenai oh iangara lapalap akan ahpw kapwaiada mehkoaros me nanmwarki lapalapo koasoanedier nan kosonnedo. <sup>14</sup> Kaunen mehn Suhs ako ahpw nannanti ni kokoupen Tehnpas Sarawio lao pweida sang ni kaweidpen soukohp Akkai oh Sekaraia. Re ahpw kaimwsekala Tehnpaso nin duwen Koht en Israel



eh ketin koasoanedier oh pil Sairus, Darius, oh Ardaserk-sihs,<sup>i</sup> nanmwarki lapalap akan en Persia. <sup>15</sup> Kokoupen Tehnpas Sarawio eri imwisekla ni rahn kesiluhn sounpwong Adar, ni keweneun pahren mwehin Nanmwarki Lapalap Darius. <sup>16</sup> Eri, mehn Israel ko—samworo ko, mehn Lipai ko, oh aramas teiko koaros me sapahldo sang ar kalipilipala—ahpw wiahda isimwas en Tehnpas Sarawio ni peren lapalahpie. <sup>17</sup> Eri, ong ni isimwas wet re meirongkihla kouwol 100, sihpw 200, oh sihmpwul 400; oh kuht 12 wiahla mehn meirong en dihp, emenemen kuht ong ehuehu kadaudok en Israel. <sup>18</sup> Re pil koasoanehdi samworo oh mehn Lipai ko ong ni doadoahk en papah nan Tehnpas Sarawio nan Serusalem, duwen me koasoandier nan Pwuhken Moses.

#### *Kamadipw en Pahsohpa*

<sup>19</sup> Eri, aramas ako me sapahldohsang ar kalipilipala ahpw wiahda Sarawien Pahsohpa ni rahn kaeisek pahieun tepin sounpwong en pahr mwurin ar sapahldo. <sup>20</sup> Samworo oh mehn Lipai koaros eri pein kamwakeleirailda, koaruhsie mwakelekellahr ong sarawi. Re ahpw kemehla mahn en Pahsohpa kan oh meirongkihla ni mwaren aramas koaruhsie me sapahldohsang ar kalipilipala, ni mwaren iangarail samworo ko, oh pil ni pein mwararail. <sup>21</sup> Mehn Israel koaros me sapahldohsang ar kalipilipala ahpw tungoalehla mehn meirong ko, oh pil irail ko koaros me kese-lahr tiahk en me rotorot akan me kin mihmi nan sahpwo, me kohdo pwe re en iang kaudokiong KAUN-O, Koht en Israel. <sup>22</sup> Re ahpw pil wiahda Sarawien Pilawa Sohte Doal Ihs ni pereperen erein rahn isuh. Re kin pereperen laud pwehki KAUN-O eh ketin kawekala kupwur en nanmwarki

<sup>i</sup> 6:14: ARDASERKSIHS: Iei Ardaserksihs Keieu me wia nanmwarki lapalap en Persia sang pahr 465 lel pahr 424 mwohn Kraiss. 6:14: Ak. 1.1; b Sek. 1.1. 6:19: Eks. 12.1-20.

lapalap en Asiria J pwe en seweseirailda ni kokoupen Tehnpas en Koht en Israel.

## 7

*Esra Lellahng Serusalem*

<sup>1</sup> Mwurin sounpar tohto, ni mwehin Ardaserksihs, nanmwarki lapalap en Persia, mie ohl emen me adaneki Esra. E ahpw rapahki kodoudoupe lellahng Aaron, Samworo Lapalapo, nin duwe met: Esra nein Seraia, Seraia nein Asaraia, Asaraia nein Ilkaia, <sup>2</sup> Ilkaia nein Sallum, Sallum nein Sadok, Sadok nein Ahidup, <sup>3</sup> Ahidup nein Amaraia, Amaraia nein Asaraia, Asaraia nein Meraiod, <sup>4</sup> Meraiod nein Serahaia, Serahaia nein Ussai, Ussai nein Pukki, <sup>5</sup> Pukki nein Apisua, Apisua nein Pineas, Pineas nein Eliesar, Eliesar nein Aaron.

<sup>6-7</sup> Esra, iei ohl loalokong men me inenen koahiek ni Kosonned me KAUN-O, Koht en Israel, ketikihong Moses. Pwehki Koht eh ketin kupwuramwahwih Esra, nanmwarki lapalapo kin ketin mweidohng mehkoaros me e kin patohwan peki reh. Eri, ni keisuhn sounpar en mwehin Ardaserksihs, Esra ahpw iang pwihnen mehn Israel ehu oh mweselsang Papilonia kolahng Serusalem, me iang pwihn wet, iei samworo kei, mehn Lipai kei, sounkeseng en nan Tehnpas Sarawio, sounsilepen Tehnpas Sarawio kei oh tohndoadoahk kei. <sup>8-9</sup> Re mweselsang Papilonia ni rahn keieu nan keieun sounpwong, oh re ahpw lel Serusalem pahn sawas en nin limen Koht ni rahn keieu nan kelimaun sounpwong. <sup>10</sup> Esra kasarawihong eh mour ni sukuhlki pelien Kosonned en KAUN-O, ni kapwaiada Kosonnedo, oh pil ni padahkihong mehn Israel kan audepen Kosonnedo kan.

---

J 6:22: NANMWARKI LAPALAP EN ASIRIA: Likamwete nanmwarki menet iei ih me pil kakaun wehi me mahs adaneki Asiria, me kin wia imwintihti en Israel mahs.

*Kisinlikou me Nanmwarki Lapalap Ardaserksihs Ketikihong Esra*

<sup>11</sup> Eri, Nanmwarki Lapalap Ardaserksihs ahpw ketikihong Esra, samworo oh ohl loalokong me inenen koahiek mehlel ni kosonned oh koasoandi kan me KAUN-O ketikihong mehn Israel, kisinlikou kesempwal kiset:

<sup>12</sup> Sang Nanmwarki Lapalap Ardaserksihs ong samworo Esra, ohl loalokong oh koahiek ni Kosonned en Koht en Nanleng,<sup>k</sup>

<sup>13</sup> “I koasoanedier pwe mehn Israel koaros me kin mihmi nan ei wehi, iangahki samworo kan oh mehn Lipai kan, me inengieng, re en kak iang komwi patolahng Serusalem. <sup>14</sup> Ngehi, iangahki nei sounkaweid isimen kan, se kadarkomwiwei pwe komwi en patowohng kalelapak iren mour nan Serusalem oh Suda, oh kilang ia duwen aramas akan ar kin kapwaiada Kosonned en omwi Koht, pwe doadoahk ehu met me komw pwukoahkidier. <sup>15</sup> Eri, komw pahn patohwanda meirong en kohl oh silper kan me ngehi oh ei sounkaweid kan men meirongkihong Koht en Israel, me tehnpese mi nan Serusalem. <sup>16</sup> Komw pil pahn patohwanda kohl oh silper koaros me komw pahn rikada sang nan wehi kan me mi pahn manaman en wehin Papilon oh kiskis kan me mehn Israel oh ar samworo kan pahn kin kihda ong ni Tehnpas Sarawien ar Koht nan Serusalem.

<sup>17</sup> “Eri, komw pahn uhdahn doadoahngki kanahieng mwohni pwukat oh pwainkihda kouwol, sihpw, sihpwul, wahnsahpw, oh wain, oh meirongkihla pohn pei sarawien Tehnpas sarawio nan Serusalem. <sup>18</sup> Komw kak doadoahngki silper oh kohl me luhwehdi ong ni

---

<sup>k</sup> 7:12: Ire tikitik 12-26 ntingdier ni mahsen me adaneki Aramaik (pil tehk 4.7).

mehkot me komwi oh iengomwi tohn wehi kan in-  
engiang, nin duwen kupwur en amwail Koht. <sup>19</sup> Komw  
pahn patohwandahng Koht nan Serusalem dahl koaros  
me kohieng komwi pwe en doadoahk nan Tehnpas  
Sarawio. <sup>20</sup> Eri, mehkot tohrohr me komw anahne ong  
Tehnpas Sarawio, komw kak alehsang ni wasahn nek  
mwohni en nanmwarki.

<sup>21</sup> “I koasoanedi kumwail en kaweid mwohni en wehin  
Palikapi-en-Iupreitis pwe kumwail en kin mwadang  
kihong Esra, samworo oh ohl koahiek ni Kosonned  
en Koht en Nanleng, mehkoaros me e pahn kin peki  
rehmwail, <sup>22</sup> me uwe sohte pahn daulih paun 7,500  
en silper, 550 kalon en lehn olip, oh soahl uwen  
me e anahne. <sup>23</sup> Kumwail pahn kanahieng kihong  
mehkoaros me Koht en Nanleng ketin anahne ong  
Tehnpese, pwe en dehr kin ketin engiang pahi oh pahn  
irail kan me pahn kaunda mwuri. <sup>24</sup> Kumwail en pil  
ese pwe e keinepwi kumwail en rikada daksis sang  
rehn samworo kan, rehn mehn Lipai kan, sounkeseng  
kan, silepe kan, tohndoadoahk kan, de sang rehn emen  
sohte lipilipil me kin doadoahk ong Tehnpas Sarawio.

<sup>25</sup> “A komwi, Esra, nin duwen kupwurokong me omwi Koht  
ketikihong komwi, komw pahn idihada sounkohwa kei  
oh sounkopwung pwe re en kin apwahpwalih aramas  
koaros me kin mihmi ni Palikapi-en-Iupreitis me kin  
kekeidki Kosonned en amwail Koht. Komw uhdahn  
pahn padahkihong mehmen sohte lipilipil me sohte  
ese duwen Kosonnedo. <sup>26</sup> Mehmen me sohte pahn  
peikiong Kosonned en amwail Koht de kosonned akan  
en wehi wet, e uhdahn pahn ale kalokolok mwadang:  
Eri, kalokolok en kamakamala, de kalipilipala, de sapwe  
pahn pehdsang, de e pahn lekdekiong nan imweteng.”

*Esra Kapinga Koht*

<sup>27</sup> Esra eri patohwan, “Kitail kapinga KAUN-O, Koht en atail pahpa kahlap ako! Pwe ih me ketin kamwaki-dada kupwur en nanmwarki lapalapo pwe en kupwure-hda kalinganahla Tehnpas en KAUN-O nan Serusalem ni soangen mwohmwet. <sup>28</sup> Sang ni kupwurkalahngan en Koht me I patohwan alehkihdi keniken pahn kupwur en nanmwarki lapalapo, pahn sapwellime sounkaweid kan, oh pahn sapwellime lapalap me manaman akan koaros. Koht ketin kakehleihda, pwe I en kak wekidala kapehd en me mah tohto sang ni peneineien mehn Israel kan pwe re en iang ie sapahllahng Serusalem.”

## 8

### *Aramas akan me Sapahldohsang Ar Kalipilipala*

<sup>1</sup> Iet mwaren kaunen peneinei kan me kalipilipalahngehr nan Pabilonia oh me iang Esra sapahldohr Serusalem ni ahnsou me Ardaserksihs wiewiahki nanmwarki lapalap.

<sup>2-14</sup> Kersom, sang peneineien Pineas

Daniel, sang peneineien Idamar

Addus, nein Sekanaia, sang peneineien Depit

Sekaraia, sang peneineien Paros, iangahki ohl 150 sang  
nan eh peneinei (mie pwuhk kei me pil kasalehda  
irekidien arail peneinei kan)

Eliehoenai, nein Serahaia, sang peneineien Pahad Mohap,  
iangahki ohl 200

Sekanaia, nein Sahasiel, sang peneineien Saddu, iangahki  
ohl 300

Eped, nein Sonadan, sang peneineien Adin, iangahki ohl  
50

Sesaia, nein Adalaia, sang peneineien Elam, iangahki ohl  
70

Sepadaia, nein Maikel, sang peneineien Sepataia, ian-  
gahki ohl 80

Opadaia, nein Sehiel, sang peneineien Sohap, iangahki ohl  
218  
Selomid, nein Sosipaia, sang peneineien Pani, ingahki ohl  
160  
Sekaraia, nein Pepai, sang peneineien Pepai, iangahki ohl  
28  
Sohanan, nein Akkatan, sang peneineien Askad, ingahki  
ohl 110  
Elipelet, Seuel, oh Semaia, sang peneineien Adonikam,  
iangahki ohl 60 (mepwukat sapahldo ehu ahnsou  
mwuri)  
Udai oh Sakur, sang peneineien Pikpai, ingahki ohl 70

*Esra Rapahkihda mehn Lipai kan ong ni Epwelpen Tehnpas Sarawio*

<sup>15</sup> I kapokonepene pwihno limwahn dahu me kolahng ni kisin kahnimw Ahapa, oh se mihmihki wasao rahn siluh. Ngehi eri diarada me mie samworo kei nanpwungen pwihno, ahpw sohte mehn Lipai. <sup>16</sup> Ngehi eri ileklahng kaun duwemen pwukat pwe re en patohdo: Elieser, Ariel, Semaia, Elnadan, Sarip, Elnadan, Nadan, Sekaraia, oh Mesullam, oh sounpadahk riemen, Soiarip oh Elnadan. <sup>17</sup> Ngehi eri kadarirailahng rehn Iddo, kaunen aramas akan nan Kasipia, pwe re en peki reh oh rehn ienge kan, oh rehn tohndoadoahk kan en Tehnpas Sarawio, re en kadorodohng kiht aramas me pahn papah Koht nan Tehnpas Sarawio. <sup>18</sup> Sang ni kupwurkalahngan en Koht, re ahpw kadorodo reht Serepaia, ohl koahiek men, mehn Lipai sang peneineien Mahli; oh nah pwutak ehk welimen, oh rie ohl akan pil iang ih patohdo. <sup>19</sup> Re pil kadorodo Asapaia oh Sesaia, sang peneineien Merari, iangahki kisehrail me riehk. <sup>20</sup> Likin mepwukat, pil mie tohndoadoahk 220 en Tehnpas Sarawio me Nanmwarki Depit oh sapwellime lapalap ako ketin piladahr arail pahpa kahlap ako pwe re

en kin iang sewese mehn Lipai kan. Mwararail kan koaros pil iangehr ntingdi.

*Esra Kaunda Aramas ako ni Kaisihsol oh Kapakap*

<sup>21</sup> I ahpw koasoanehdi wasao limwahn Dahun Ahapa, pwe kiht koaros en kaisihsol oh aktikitikla mwohn silangin atail Koht oh peki en ketin kahluwai kiht nan at seiloak oh ketin doandoarei kiht oh at tungoal seri kan, iangahki at dipwisou kan koaros. <sup>22</sup> I namenengki peki rehn nanmwarki lapalapo en ketikihda ehu pwihnen sounpei me pahn sinsilei kiht sang at imwintihti kan nan at seiloak, pwehki ei patohwanohng me Koht kin ketin kupwuramwahwih koaros me kin likih, ahpw e kin ketin kupwursuwedkihla oh ketin kaloke mehmen me kin sohpeisang. <sup>23</sup> Eri, se ahpw kaisihsol oh kapakapohng Koht pwe en ketin sinsilei kiht, e ahpw ketin karonge at tungoal kapakap.

*Kisakis kan ong Tehnpas Sarawio*

<sup>24</sup> I ahpw pilada Serepaia, Asapaia, oh pil me ehk sang nanpwungen samworo ko me kin wia kaun. <sup>25</sup> Ngehi eri paunihada silper, kohl, oh dipwisou kan me nanmwarki lapalapo, sapwellime sounkaweid kan oh lapalap akan, oh mehn Israel ketikidahr mehn doadoahk nan Tehnpas Sarawio, ngehi eri patohwanohng samworo ko. <sup>26-27</sup> Eri, iet uwen dipwisou kan me I patohwanohng irail:

silper- ten 25

dipwsoun kan me wiawihhkida silper- poun 150

kohl- poun 7,500

pwohl kohl 20- ounses 270

pwohl prons kaselel 2, me pahrekiong pweinen pwohl kohl kan

<sup>28</sup> Ngehi eri patohwanohng irail, “Kumwail me sarawi mwohn silangin KAUN-O, Koht en amwail pahpa kahlap ako, pil iangahki dipwisou kohl oh silper kan me kumwail patohwandohngehr nin duwen meirong en nsen. <sup>29</sup> Kumwail sinsile mwahu dipwisou kan lao kumwail lellahng ni Tehnpas Sarawio. Kumwail ahpw pahn paunihada dipwisou kan nan en samworo kan arail pereoh oh patohwanohng kaun akan en samworo kan oh ong mehn Lipai kan, oh ong kaun akan en mehn Israel nan Serusalem.” <sup>30</sup> Eri, samworo ko oh mehn Lipai ko ahpw uhd alehda silper, kohl, oh dipwisou ko, pwe re en patohwanlahng nan Tehnpas Sarawio nan Serusalem.

*Sapahldo ong nan Serusalem*

<sup>31</sup> Iei ni kaeisek riaun keieun sounpwong me se mwe-selsang Dahun Ahapa pwe se en patolahng Serusalem. At Koht ketin iegang kiht oh ketin sinsilei kiht sang at imwintihti pwe re dehr mahwen de peiong kiht nindokon at seiseiloak. <sup>32</sup> Ni at lellahng Serusalem, se ahpw kommoaldi erein rahn siluh. <sup>33</sup> Eri, ni kapahieun rahno se ahpw patolahng ni Tehnpas Sarawio, paunihada kohl, silper, oh dipwisou ko, oh uhd patohwanohng samworo Meremod, nein Uraia pwutak. Me iang ihiei Eleasar, nein Pineas oh mehn Lipai riemen, Sosapat, nein Sesua oh Noadaia, nein Pinnui. <sup>34</sup> Soahng koaros ahpw wadawadedi oh paunda, oh ntingdien dipwisou koaros ahpw wiawihda ni ahnsowohte.

<sup>35</sup> Irail koaros me sapahldo sang ar kalipilipala ahpw patohwando meirong kei pwehn wia arail mehn meirong isihsong Koht en Israel. Re wiliandi mehn Israel koaros oh meirongkihla kouwol 12, sihpw wol 96, oh sihmpwul 77; re pil meirongkihla kuht 12 pwe re en kamwakelehkihda pein diparail. Mahn pwukat koaros isihsla nin duwen meirong ong KAUN-O. <sup>36</sup> Re pil patohwanda doaropwe



kesempwal me nanmwarki lapalapo ketikihong irail oh patohwanlahng rehn kepina kan oh lapalap akan en Palikapi-en-Iupreitis, re ahpw ketikihda arail sawas ong aramas akan oh ong ni kaudok en nan Tehnpas Sarawio.

## 9

*Esra Esehda duwen mehn Suhs ar Pwoudikihda me Kaidehn mehn Suhs*

<sup>1</sup> Mwurin mepwukat eh wiawiher, ekei kaunen mehn Israel ko ahpw patohdo oh patohwanohng ie me aramas akan, samworo kan, oh mehn Lipai kan sohte tohrohrasang tohn wehi kan me mihte mparail me iei mehn Ammon, Mohap, oh Isip de mehn Kenan, mehn Id, mehn Peris, mehn Sepus, oh mehn Amor. Re pil iang wiewia tiahk saut me aramas pwukat kin wia. <sup>2</sup> Ohl en Suhs kan pwoudikidahr lihen liki kan, eri, sapwellimen Koht aramas sarawi kan pil iangehr saminla. Kaun akan oh lapalap akan me wia poahsoan en sapwung wet. <sup>3</sup> Ni ei rongada duwen met, I ahpw tehrpeseng ei likou kan pwehki ei nsensuwed, kapingada pitenmoangei oh ei alis kan, oh ngehi mwohndi nan ei pahtou laud. <sup>4</sup> I mwomwohd wasao wie mwahmwahiei lao lel ahnsou me meirong en nin soutik kin wiawi, oh aramas akan ahpw tapihada pokonpene oh kapiliepene—iei irail koaros me masepwehk pwehki dahme Koht en Israel ketin mahsaniher me pid dipen irail kan me saphaldohsangehr ar kalipilipala.

<sup>5</sup> Ni eh lelehr ahnsoun meirong en nin soutik, I ahpw uhda sang wasa me I wie mwahmwahiei ieo, oh mihmihte nan ei likou ko me I tehrpeseng, I ahpw kelepwhikihdi oh kapahla pehi kat oh kapakap ong KAUN-O, ei Koht.

<sup>6</sup> I patohwan, “Maing Koht, I namenek sarada mwohn

silangomwi. Dipat akan koasoakoasoakdahr oh ileile-sangehr moangat akan; re leldawohngkehr pahnlahng. <sup>7</sup> Sang ni mwehin at pahpa kahlap ako leledo met, kiht, sapwellimomwi aramas, wiadahr dihp lapalahpie. Pwehki dipat akan, kiht, at nanmwarki kan, oh at samworo kan lohdiar nin limen nanmwarkien liki kan, se ahpw kamakamala, pirapala, oh wisiksangehr nin duwen aramas selidi kei. Se uhdahn namenekla kowahlap, namenamenekkehr lel rahnwet. <sup>8</sup> Eri, Maing KAUN, kisin ahnsou kis me komwi ketin kupwurkalahngan oh ketin mweidohng ekei kiht en pitsang at kalidu oh kousoanla wasa sarawi wet. Komwi ketin mweidohnger se en pitsang kalidu oh ketikidohngkitehr mour kapw. <sup>9</sup> Se wialahr lidu kei, ahpw komwi sohte ketin mweidohng se en patopato nan mour en lidu. Komwi ketin kupwuredahr nanmwarki lapalap en Persia en poakeikitala oh mweidala se en momourte oh pwurehng onehda sapahl Tehnpesomwi Sarawio me ohlahr, oh se en diar wasaht nan Suda oh Serusalem, wasa me se pahn saledek sang apwal ie.

<sup>10</sup> “Eri met, Maing Koht, dahme se kak patohwan pwehki mehkan koaros me wiawiher? Se pwurehngkehr sapekiong mahsen kan <sup>11</sup> me komwi ketikihongkehr sapwellimomwi ladu soukohp ako, pwe re en patohwanohng kiht. Re patohwanohng kiht me sahpw me se pahn kousoanla loale me samin pwehki towe kan audehkihla sang apali lel apali tiahk oh mwekid saut kan. <sup>12</sup> Re patohwanohng kiht se en dehr pwoudikihda aramas pwuko, oh se en dehr sewese kapaairailda de mweidohng re en pweida ni mehкот ma se men pereperenki sahpw oh pil kihong kadaudokat akan en sohsohki kohkohlahte. <sup>13</sup> Mehndahte mehkoaros me pweidahr reht pwehn wia kalokepen dipat akan oh at sapwung kan, se patohwan

---

9:12: Eks. 34.11-16; Deud. 7.1-5.

ese me komwi, at Koht, ketin kalokei kiht tikitik sang me se konehng ale oh ketin mweidohng se en momourte. <sup>14</sup> Eri, ia duwen at pahn kak pwurehng pohnsehsehla sapwellimomwi kosonned kan oh pwoudikihda soangen aramas suwed pwukat? Ma se pahn pwurehng wia met, komwi uhdahn pahn engiengda kowahlap oh pahn ketin kamwomwkitala douluhl oh sohte ketin mweidohng emen en mourla. <sup>15</sup> Maing KAUN, Koht en Israel, komwi me pwung, ahpw komwi ketin mweidohng se en mourla. Se patohwan sakarkihda dipat akan mwohn silangmwi; se sohte tungoalenki pwung en patohdo mwohn silangmwi.”

## 10

### *Koasoandien Katoktokdien Pwopwoudpene kan*

<sup>1</sup> Nindokon Esra eh poaridi wie kapakap mwohn Tehnpas Sarawio, wie sengiseng oh sakasarkihda dihp pwukat, lapalahn pokon en mehn Israel ehu—ohl, lih, oh seri—ahpw kapilpene, oh iang wie sengiseng kowahlap.

<sup>2</sup> Sekanaia, nein Sehiel, sang peneineien Elam, eri patohwanohng Esra, “Se kauwelahr at inou ong Koht ni at pwoudikidahr lihen liki kan, ahpw pil mihmiehte at koapworopwor ong Israel. <sup>3</sup> Eri, met se pahn wiahda ehu inou ong atail Koht, me se pahn kadarala lih pwukat iangahki seri kan. Se pahn kapwaiada dahme komwi oh meteikan me kin wauneki sapwellimen Koht mahsen kan pahn kaweidkin kiht. Se pahn kapwaiada dahme sapwellimen Koht Kosonnedo koasoanehdi. <sup>4</sup> Met iei omwi pwukoa en koasoanehdi. Se pahn utung komwi, eri komwi wenla mwowe oh koasoanehdi.”

<sup>5</sup> Esra eri tapihada ni eh koasoanehdi kaun akan, samworo kan, mehn Lipai kan, oh aramas teikan en wiahda inou

lap ehu me re pahn kapwaiada dahme Sekanaia patohwan kasaledahr. <sup>6</sup> E ahpw patohsang mwohn Tehnpas Sarawio oh patohlongala wasa me Sehohanan, nein Eliasip, kin kousoan ie, oh patopato wasao pwohngo wie mwahmwahieiki soaloalopwoat en aramas ako me kalipilipalahr. E sohte tungoale de nim mehkot.

<sup>7</sup> Kair ehu ahpw pekederpeseng wasa koaros nan Serusalem oh Suda, me aramas koaros me pwurodohsangehr ar kalipilipala en pokonpene nan Serusalem <sup>8</sup> sang ni koasoandien kaunen aramas akan. Ma mehmen sohte pwarodo erein rahn siluh, sapwe pahn pehdsang, oh sohla pahn eh pwung en wia kisehn mehn Israel. <sup>9</sup> Erein rahn siluh, ni karieisek en rahn en kaduwaun sounpwong, aramas koaros me koukousoan nan sapwen Suda oh Pensamin ahpw patohdo Serusalem oh pokonpene wasahn tuhpenehn ni Tehnpas Sarawio. Rahno lapalahn keteu, oh pwehki iren mesenlahng oh kesempwal en tuhpeneo, aramas koaros wie rerrer.

<sup>10</sup> Samworo Esra ahpw patohda oh patohwanohng irail, “Kumwail soaloalopwoat oh kahredohr dih pohn Israel ni amwail pwoudikihda lihen liki kan. <sup>11</sup> Eri, met kumwail sakarkihda dipamwail kan ong KAUN-O, Koht en amwail pahpa kahlap ako, oh wia dahme pahn kaparanda kupwure. Kumwail tohrohrasang mehn liki kan me koukousoan nan sapwatail oh mweisang amwail pwoud mehn liki kan.”

<sup>12</sup> Aramas ako eri werida sapeng, patohwan, “Se pahn kapwaiada mekoaros me komwi mahsanih.” <sup>13</sup> Re ahpw pil usehla patohwan, “Pokon wet me nohn laud, oh keteu wet me laud. Se sohte kak kesikesihnen likiet. Met kaidehn mehkot me kak wiawihla erein rahn ehu de riau, pwehki me ngeder reht me iang pid dih wet. <sup>14</sup> Mweidohng atail lapalap akan en ketiket nan Serusalem oh pwukoahki ire

wet. Eri, mehmen me pwoudiki lihen liki en patohdo rahn me pahn kileledi, iangahki kaun akan oh sounkopwung kan en eh kahnimw. Ni duwe met, sapwellimen Koht engieng ong ni ire wet pahn sohla.” <sup>15</sup> Sohte emen me uhwong koasoandi wet, ihte me uhwong iei Sonadan, nein Asahel oh Sahseia, nein Tikpa, oh me utung ira iei Mesullam oh Sapedai, mehn Lipai men.

<sup>16</sup> Me kalipilipala ko pwungki koasoandi wet, samworo Esra eri pilada ohl ekei nanpwungen kaunen peneinei kan oh ntingihedi mwararail kan. Ni rahn keieu en kaeisek en sounpwong, re ahpw tapihada arail roporop, <sup>17</sup> oh erein sounpwong siluh re ahpw diarada ohl akan me pwoudiki lihen liki kan.

*Ohl akan me Pwoudiki Lihen Liki kan*

<sup>18</sup> Iet mwaren ohl akan me pwoudiki lihen liki kan: Samworo kan, mwararail kan kileledi ni waden peneinei: Peneineien Sesua oh rie pwutak kan, nein Sehosadak: Maaseaia, Elieser, Sarip, oh Kedalaia. <sup>19</sup> Re inoukihda me re pahn mweisang ar pwoud kan, oh re meirongkihla kuht wol men nin duwen meirong en diparail kan.

<sup>20</sup> Peneineien Immer: Ananai oh Sepadaia

<sup>21</sup> Peneineien Arim: Maaseaia, Elaia, Semaia, Sehiel, oh Usaia

<sup>22</sup> Peneineien Pasuhr: Elioenai, Maaseaia, Ismael, Nedanel, Sosapad, oh Elasa

<sup>23</sup> Mehn Lipai kan:

Sosapad, Simei, Kelaia (me pil kin mwarenki Kelita),  
Pedahaia, Suda, oh Elieser

<sup>24</sup> Sounkeseng kan:

Eliasip

*Sounsilasil kan en Tehnpas Sarawio:*

Sallum, Telem, oh Uri

<sup>25</sup> Meteikan:

Peneineien Paros: Ramaia, Isaia, Malkaisa, Misamin, Eleasar, Malkai- sa, oh Penaia

<sup>26</sup> Peneineien Elam: Madanaia, Sekaraia, Sehiel, Abdi, Seremod, oh Elaia

<sup>27</sup> Peneineien Saddu: Elioenai, Eliasip, Madanaia, Seremod, Sapad, oh Asisa

<sup>28</sup> Peneineien Pepai: Sehohanan, Ananaia, Sappai, oh Adlai

<sup>29</sup> Peneineien Pani: Mesullam, Malluk, Adaia, Sasup, Seal, oh Seremod

<sup>30</sup> Peneineien Pahad Mohap: Adna, Kelal, Penaia, Maaseaia, Madanaia, Pesalel, Pinnui, oh Manase

<sup>31-32</sup> Peneineien Arim: Elieser, Issaisa, Malkaisa, Semaia, Sihmion, Pensamin, Malluk, Semaraia

<sup>33</sup> Peneineien Asum: Mattenai, Mattada, Sapad, Elipelet, Seremai, Manase, Simei

<sup>34-37</sup> Peneineien Pani: Maadai, Amram, Uel, Penaia, Pedeia, Keluhi, Panaia, Meremod, Eliasip, Madanaia, Mattenai, oh Saasu

<sup>38-42</sup> Peneineien Pinnui: Simei, Selimaia, Nadan, Adaia, Maknadepai, Sasai, Sarai, Asarel, Selemaia, Semaraia, Sallum, Amaraia, oh Sosep

<sup>43</sup> Peneineien Nepo: Seiel, Mattidaia, Sapad, Sepina, Sadaidai, Soel, oh Penaia

<sup>44</sup> Ohl pwukat koaros pwoudiki lihen liki. Re ahpw mweisang irail oh kadiriraila iangahki neirail serikan.

**Pohnpeian Bible**  
The Holy Bible in the Pohnpeian language of the Federated States of  
Micronesia

copyright © 2006 Bible Society of the South Pacific

Language: Pohnpeian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-09-08

---

PDF generated using Haiola and XeLaTeX on 28 Jul 2020 from source files dated 23 Jul 2020

9fdb3393-5132-5d45-b635-9e2989395fdc